

**ՀԱՅԱՍՏԱՆԻ ՉՄՇԱԿԿՈՂ ՎԱՐԵԼԱՅՈՂԵՐԻ
ԱՐԴՅՈՒՆԱՎԵՏ ՕԳՏԱԳՈՐԾՄԱՆ ԵՎ ՆՊԱՏԱԿԱՅԻՆ
ՆՇԱՆԱԿՈՒԹՅԱՆ ՎԵՐԱԿԱՆԳՆՄԱՆ
ՔԱՂԱՔԱԿԱՆՈՒԹՅԱՆ ՓԱՍՏԱԹՈՒՂԹ**



Երևան, 2025թ.

Նախաբան

Հողերի արդյունավետ օգտագործումը և վերականգնումը կարևոր նշանակություն ունեն հայաստանի գյուղատնտեսության կայուն զարգացման, բնապահպանական կայունության և գյուղական համայնքների բարեկեցության համար: Տարիներ շարունակ հողային ռեսուրսների ոչ պատշաճ օգտագործումը, անապատացման գործընթացները և գյուղական բնակչության նվազումը հանգեցրել են վարելահողերի որակի անկման և մեծ թվով հողատարածքների լքման:

Համաձայն 2018 թվականի հողային հաշվեկշռի՝ գյուղատնտեսական նշանակության հողերը կազմում են 2044.5 հազ. հա, որից վարելահողերը՝ 445.6 հազ. հա: Սակայն, այս վարելահողերից մշակվել է միայն 242.8 հազ. հա կամ 54.5%-ը: Սա նշանակում է, որ վարելահողերի 45%-ից ավելին չի մշակվում: Այս խնդիրն ունի բազմաթիվ պատճառներ, մասնավորապես այն պայմանավորված է հողի մասնատվածությամբ, ոռոգման խնդիրներով, հողի բերրիության անկումով և գյուղական համայնքներից արտագաղթով:

Խնդիրների վերլուծություն

Հայաստանի գյուղատնտեսական ոլորտը բախվում է մի շարք մարտահրավերների, որոնք ազդում են հողերի արդյունավետ օգտագործման և գյուղական համայնքների զարգացման վրա: Ստորև ներկայացված են հիմնական խնդիրները՝ հիմնված հասանելի տվյալների և ուսումնասիրությունների վրա:

1. Անարդյունավետ մշակվող կամ չմշակվող վարելահողերի հիմնախնդիրը

Հայաստանում վարելահողերի զգալի մասը չի օգտագործվում նպատակային: Ըստ պաշտոնական տվյալների՝ վարելահողերի շուրջ 45%-ը չի մշակվում:¹

Հիմնական պատճառներ՝

1. Հողերի մասնատվածություն

Հայաստանում հողային ռեսուրսների արդյունավետ կառավարումը լրջորեն տուժում է հողերի մասնատվածության հետևանքով: Սեփականաշնորհման գործընթացից հետո ձևավորված հողօգտագործման կառուցվածքը հանգեցրել է այն իրավիճակին, երբ մեծ թվով փոքրածավալ, տարածքային առումով մեկուսացված հողակտորներ չեն ապահովում տնտեսապես շահավետ գործունեության իրականացում: Բացի տեխնիկական և ինստիտուցիոնալ խնդիրներից, մասնատվածության պատճառով հողօգտագործողները հաճախ ունեն սահմանափակ տեսլական՝ հողը դիտելու որպես ռազմավարական ռեսուրս:

¹ <https://hy.armradio.am/archives/333850>

Հիմնական խնդիրներ՝

- Հողակտորների չափերի փոքրություն և տարածքային սփռվածություն, ինչը խոչընդոտում է ռացիոնալ ծրագրավորման և կառավարման հնարավորությունը:
- Արտադրության մասշտաբի տնտեսության բացակայություն՝ բերքի ինքնարժեքի բարձրացում և մրցունակության նվազում:
- Մեխանիզացիայի և տեխնոլոգիական լուծումների կիրառման սահմանափակումներ:
- Ձրաբաշխման, ճանապարհային և այլ ենթակառուցվածքների արդյունավետ օգտագործման անհնարինություն:
- Համագործակցության ցածր մակարդակ՝ պայմանավորված սեփականության բաշխման, վստահության և կազմակերպչական խնդիրներով:
- Ներդրումների նկատմամբ նվազ հետաքրքրվածություն՝ փոքր հողակտորների կողմից տնտեսական արդարացում չապահովելու պատճառով:

2. Ոռոգման համակարգերի անբավարարություն

Ըստ Էկոնոմիկայի նախարարության տվյալների՝ փաստացի ոռոգելի տարածքները կազմում են շուրջ 117 հազար հեկտար, ինչը շատ փոքր թիվ է ընդհանուր գյուղատնտեսական նշանակության հողերի համեմատ:²

Հիմնական խնդիրներ՝

- Ոռոգման ենթակառուցվածքների մաշվածություն և ոչ բավարար վիճակ: Ոռոգման համակարգերի մեծ մասը պահանջում է արդիականացում:
Հայաստանի ոռոգման համակարգերը ներառում են մոտ 17,000 կմ ջրագծեր և ջրանցքներ, որոնցից շուրջ 14,000 կմ-ը գտնվում է հողային պայմաններում: Այս համակարգերի ավելի քան 70%-ը հնացած է, ինչը հանգեցնում է ջրի զգալի կորուստների՝ մինչև 40-50%:³
- Ձրային ռեսուրսների անարդյունավետ կառավարում: Ոռոգման ջրի կորուստները և անարդյունավետ բաշխումը նվազեցնում են ոռոգման արդյունավետությունը:

3. Հողի դեգրադացիա և աղակալում

² <https://hy.armradio.am/archives/333850>

³ https://evnreport.com/magazine-issues/irrigating-efficiently/?utm_source=chatgpt.com

ՀՀ-ում առկա է ավելի քան 24,000⁴ հա աղակալված հողատարածք, որոնք այժմ դուրս են շրջանառությունից: Դրանց գերակշիռ մասը համայնքային սեփականություն է: Գյուղատնտեսական հողերի զգալի հատվածը ենթարկված է դեգրադացիայի տարբեր ձևերի՝ Էրոզիա, աղակալում, բերրիության կորստի և կառուցվածքի խախտման ձևով: Հողերի դեգրադացիայի տարեկան տնտեսական վնասը Հայաստանում կազմում է շուրջ 111 միլիոն ԱՄՆ դոլար: ⁵ Դեգրադացիայի պատճառները բազմաշերտ են՝ ներառելով ինչպես բնական, այնպես էլ մարդածին գործոններ, որոնք փոխազդում են միմյանց հետ՝ խորացնելով հողի բերրիության նվազման գործընթացը:

Հիմնական խնդիրներ՝

- **Բնական գործոններ՝**

- Ջրային և քամու Էրոզիա՝ հատկապես լեռնային և լեռնահարթավայրային տարածքներում:
- Երաշտների և տեղումների սեզոնային անբավարարության հետևանքով հողի խոնավության կտրուկ պակաս:
- Սողանքային գոտիներում հողի կայունության կորուստ և ակտիվ սողանքային գործընթացներ:

- **Մարդածին գործոններ՝**

- **Անարդյունավետ հողագտագործման գործելակերպեր՝** ցանքաշրջանառության բացակայություն, չափից ավելի խորը մշակություն, հողերի միամշակաբույս գյուղատնտեսություն:
- **Արոտավայրերի գերարածեցում,** ինչը հանգեցնում է բուսածածկույթի վերացման և հողի կառուցվածքի քայքայման:
- **Անտառահատված տարածքները՝** դառնում են մերկ հողերի տարածման պատճառ՝ նպաստելով Էրոզիային և հողի խոնավության կորստին: Անտառների հատումը խաթարում է բնական Էկոհամակարգերը և բերում է մի շարք բացասական հետևանքների հողի որակի վրա: Երբ անտառապատ տարածքները մաքրվում են ծառերից, հողը մնում է անպաշտպան՝ ինչպես արևի ճառագայթներից, այնպես էլ քամու և տեղումների ազդեցությունից:

⁴https://www.panorama.am/am/news/2017/04/03/%D5%A1%D5%B2%D5%A1%D5%AF%D5%A1%D5%AC%D5%A1%D5%AE-%D5%B0%D5%B8%D5%B2/1755324?fb_comment_id=1312270745527242_1312279965526320/gallery/news/news/news

⁵<https://documents1.worldbank.org/curated/en/099090523175040850/pdf/P17173815d072503018f461b8c8ded40056.pdf>

- **Խոզանի հրդեհման վտանգները՝** շատ լուրջ են, հատկապես այն տարածքներում, որտեղ անտառահատում է տեղի ունեցել կամ բնական բուսականությունը խաթարված է: Խոզանի հրդեհը կարող է հանգեցնել անտառային հրդեհների, կենսաբազմազանության կորստի, հողի դեգրադացիայի, օդի աղտոտման, առողջական խնդիրների և գյուղատնտեսական ու նյութական մեծ վնասների:
- **Հանքարդյունաբերության ազդեցություն՝** հողի մեխանիկական խաթարում, աղտոտում և էկոհամակարգերի ոչնչացում:

- **Աղակալում**

- Ոռոգման և դրենաժային համակարգերի թերի կառավարումը հանգեցնում են հողում աղերի կուտակմանը:
- Հատկապես Արարատյան դաշտավայրում դիտվում է աղակալման և եկորորդային աղակալման երևույթներ, որոնք կտրուկ նվազեցնում են հողի բերրիությունը:
- Աղակալված հողերը դառնում են բույսերի համար անհասանելի՝ խաթարելով նորմալ սննդային ռեժիմը:
- Աղակալման վերահսկման արդյունավետ մեխանիզմների բացակայությունը բարդացնում է մելիորացիոն միջոցառումների իրականացումը:

4. Գյուղական համայնքների շահագրգռվածության պակաս

Գյուղացիական տնտեսությունները հիմնականում փոքր են և չունեն բավարար ֆինանսական միջոցներ: Հայաստանում մեկ գյուղացիական տնտեսությանը բաժին է ընկնում շուրջ 1.5 հեկտար հողատարածք, որի 1 հեկտարը վարելահող է: Մինչև 0.5 հեկտար հողատարածք ունեցող գյուղացիական տնտեսությունները կազմում են ընդհանուրի շուրջ 42%-ը:⁶

Հիմնական խնդիրներ՝

- Փոքր հողակտորները դժվարացնում են արդյունավետ գյուղատնտեսության իրականացումը:

⁶ <https://hy.armradio.am/archives/333850>

- Ֆինանսական ռեսուրսների սահմանափակ հասանելիությունը փոքր տնտեսվարողների համար նախատեսված շրջանառու միջոցների բացակայությունն խոչընդոտում է նոր տեխնոլոգիաների և մեթոդների ներդրմանը:
- Ներկրվող գյուղմթերքի ցածր գին անմրցունակ է դարձնում

5. Արտագաղթ և աշխատուժի պակաս

Գյուղական բնակչության նվազումը և արտագաղթը հանգեցնում են աշխատուժի պակասի, ինչը բացասաբար է ազդում գյուղատնտեսության վրա:

Գյուղական բնակչության նվազման տվյալներ

- 2001 թվականին գյուղական բնակչությունը կազմում էր մոտ 1.2 միլիոն մարդ, մինչդեռ 2021 թվականին այդ թիվը նվազել է մինչև մոտ 1 միլիոն:
- Այս ընթացքում գյուղական բնակչության տոկոսային բաժինը ընդհանուր բնակչության մեջ նվազել է՝ 2001 թվականի 40%-ից մինչև 2021 թվականի մոտ 33%:⁷

Հիմնական խնդիրներ՝

- Աշխատուժի պակասի պատճառով շատ հողեր մնում են չմշակված:
- Արտագաղթը նվազեցնում է համայնքների սոցիալ-տնտեսական կենսունակությունը:
- Հայաստանի համար աշխատանքային միգրացիան տարիներ շարունակ հանդիսանում է սոցիալ-տնտեսական զարգացման կարևոր բաղադրիչ: Տնտեսական անկայունության, աշխատատեղերի սակավության և գյուղմարային եկամուտների բացակայության պայմաններում՝ բազմաթիվ հայեր, հատկապես՝ տղամարդիկ, տեղափոխվում են արտերկիր, որպեսզի աշխատեն շինարարության, սպասարկման, գյուղատնտեսության կամ այլ ոլորտներում:

Ամփոփագիր

Հայաստանի գյուղատնտեսական ոլորտի արդյունավետության բարձրացման համար անհրաժեշտ է լուծել վերը նշված խնդիրները՝ ապահովելով հողերի արդյունավետ

⁷ <https://www.macrotrends.net/global-metrics/countries/arm/armenia/rural-population>

օգտագործումը, ոռոգման համակարգերի արդիականացումը, հողի դեգրադացիայի կանխարգելումը, գյուղական համայնքների աջակցությունը և արտագաղթի նվազեցումը:

- Չմշակվող վարելահողերի աճ. Հայաստանում վարելահողերի հողերի ավելի քան 45%-ը չի մշակվում:
- Հայաստանում ոռոգման համակարգերի անկատարության հետևանքով մեծ մասը ոռոգելի հողատարածքների չի օգտագործվում նպատակային և արդյունավետ ձևով:
- Հողի դեգրադացիա և աղակալում. Ըստ Համաշխարհային բանկի կողմից հրապարակված «Project Identification Form (PIF)» փաստաթղթի՝ Հայաստանի գյուղատնտեսական հողերի մոտ 60%-ը տուժած է հողի էրոզիայի հետևանքով, ինչը պայմանավորված է անտառահատումներով և ոչ արդյունավետ գյուղատնտեսական պրակտիկաներով:
- Գյուղական համայնքների շահագրգռվածության պակաս. Գյուղացիական տնտեսությունները հիմնականում փոքր են և չունեն բավարար ֆինանսական միջոցներ:
- Արտագաղթ և աշխատուժի պակաս. Գյուղաբնակների շրջաններում հողագործությամբ զբաղվողների թիվը նվազում է:

ՀՀ-ում վարելահողերի սակավօգտագործման պատճառների կառուցվածքային աղյուսակ

Տնտեսական	Սոցիալական	Բնապահպանական	Իրավական	Տեխնոլոգիական
Ֆինանսավորման պակաս	Գյուղական արտագաղթ	Հողի դեգրադացիա, էրոզիա և աղակալման խնդիրներ	Հողային փաստաթղթերի անորոշություն	Հին մեթոդներ
Վարկերի սահմանափակ հասանելիություն	Աշխատուժի պակաս	Կլիմայի փոփոխություններ	Հողերի մասնատվածություն	Գիտելիքի պակաս
Անբարենպաստ շուկայական պայմաններ	Գյուղաբնակ հասարակության ծերացում	Ոռոգման ջրի պակաս	Քաղաքականության անկայունություն	Գիտահետազոտական աջակցության պակաս

Պետական աջակցության պակաս (մասնավորապես՝ կայուն, օրգանական գյուղատնտեսության նաջակցության ծրագրերի բացակայություն)	Շահագրգռվածու- թյան պակաս	Հողերի աղտոտում	Քարտեզագրման անճշտություններ, կադաստրային և իրական կորդինատների անհամապատասխա նություն, սխալ դասակարգման խնդիրներ	Հյուծված մեքենատրակտո- րային պարկ
Ցածր եկամտաբերություն		Ոռոգման համակարգի անկատարություն, բացակայություն		

Նպատակը

Չնայած այն հանգամանքին, որ «Գյուղատնտեսական նշանակության հողերի օգտագործման արդյունավետության բարձրացման հայեցակարգը» սահմանում է հողերի կառավարման քաղաքականության ռազմավարական մոտեցումներ՝ ուղղված անօգտագործելի, դեգրադացված և չմշակվող հողերի վերականգնմանը և արդյունավետ օգտագործմանը, փաստացի իրավիճակը ցույց է տալիս, որ հայեցակարգը դեռևս ի զորու չէ լուծել ոլորտում առկա խորքային խնդիրները: Սա վկայում է, որ նախատեսված մեխանիզմները՝ չմշակվող վարելահողերի վերագործարկման, կայուն գյուղատնտեսության խթանման և ներդրումների ներգրավման ուղղությամբ, բավարար արդյունավետությամբ չեն իրականացվում: Արդյունքում՝ հայեցակարգը մնում է հիմնականում հայեցողային փաստաթուղթ՝ առանց գործնական գործիքակազմի ու արդյունավետ գործադրման հստակ մեխանիզմների:

Այս փաստաթուղթը ներկայացնում է հողերի կառավարման քաղաքականության ռազմավարական մոտեցումներ՝ ուղղված անօգտագործելի, դեգրադացված և չմշակվող հողերի վերականգնմանը, դրանց օգտագործման խթանմանը և գյուղատնտեսական հողերի պոտենցիալի առավել արդյունավետ իրացմանը:

Այս քաղաքականության փաստաթուղթը նպատակ ունի առաջարկել կոնկրետ մեխանիզմներ՝ չմշակվող վարելահողերը վերամշակելու, կայուն գյուղատնտեսությունը խթանելու, ներդրումներ ներգրավելու և հողերի դեգրադացիան կանխարգելելու համար:

Պետական քաղաքականություն և աջակցության ծրագրեր

Գյուղատնտեսական նշանակության հողերի օգտագործման արդյունավետության բարձրացման հայեցակարգը և միջոցառումների ծրագիրը

Հայաստանի Հանրապետության գյուղատնտեսական նշանակության հողերի օգտագործման արդյունավետության բարձրացման հայեցակարգում կան մի շարք դրույթներ, որոնք վերաբերում են չօգտագործվող վարելահողերի նպատակային օգտագործման բարձրացմանը: Ստորև առանձնված են դրանցից հիմնականները՝ ըստ թեմատիկ ուղղությունների:

1. Դրույթներ, որոնք առնչվում են չօգտագործվող վարելահողերի ներգրավմանը

- **Հայեցակարգի ներածության մեջ նշվում է**, որ 2018 թվականի տվյալներով Հայաստանի վարելահողերի միայն 54.5%-ն է օգտագործվել նպատակային, ինչը ենթադրում է, որ մոտ 45%-ը չի մշակվել:
- **Գյուղատնտեսական հողերի չմշակման հիմնական պատճառներն են՝**
 - Հողակտորների փոքր չափերը և մասնատվածությունը
 - Ոռոգման ջրի հասանելիության բացակայությունը կամ անբավարար մատակարարումը
 - Գյուղատնտեսական տեխնիկայի անմատչելիությունը
 - Հողի բերրիության ցածր մակարդակը
 - Հողի սեփականատերերի երկրից դուրս գտնվելը
 - Ֆինանսական միջոցների բացակայությունը
- **Հայեցակարգի նպատակներից մեկը հստակորեն նշում է**, որ պետության քաղաքականությունն ուղղված է չօգտագործվող հողերի շրջանառության մեջ ներգրավմանը և հողի շուկայի զարգացմանը:

2. Հստակ մեխանիզմներ՝ չօգտագործվող վարելահողերի նպատակային օգտագործման խթանման համար

Հետևյալ քայլերն են նախատեսվում՝ որպես չօգտագործվող հողերի ներգրավման ուղղակի կամ անուղղակի մեխանիզմներ.

1. **Չօգտագործվող հողերի հաշվառման և դասակարգման համակարգի ներդրում**
 - Պետությունը նախատեսում է ստեղծել չօգտագործվող հողերի հաշվառման ու դասակարգման համակարգ, ինչը կնպաստի այդ հողերի նպատակային օգտագործման խթանմանը:
2. **Հողի շուկայի զարգացում և «Հողային բանկի» ստեղծում**

- Ծրագրվում է ներդնել «Հողային բանկ», որը կմիավորի չօգտագործվող հողերը և հնարավորություն կտա դրանք ժամանակավոր կամ երկարաժամկետ վարձակալության կամ վաճառքի հանձնել տնտեսվարողներին:
- Չօգտագործվող հողերի վաճառքը կամ վարձակալությունը կկատարվի աճուրդային եղանակով, ընդ որում՝ հատուկ նախապատվություն կտրվի հարևան տնտեսվարողներին և երիտասարդ գյուղատնտեսներին:

3. Հողերի կոնսոլիդացիայի (միավորման) խթանում

- **Վարելահողերի խոշորացման** ծրագրերը, որոնք կներառեն նաև չօգտագործվող հողերի միավորումը, կօգնեն ստեղծել արդյունավետ ագրոարտադրական հողակտորներ:

4. Հողի օգտագործման արդյունավետության բարձրացման խրախուսում

- Ներառված են տվյալների թվայնացում, ագրոքիմիական հետազոտությունների իրականացում, ինչը թույլ կտա ավելի հստակ պլանավորել հողերի արդյունավետ օգտագործումը, ներառյալ չօգտագործվող վարելահողերը:

5. Մելիորատիվ վատ վիճակում գտնվող հողերի վերականգնում

- Հայեցակարգում հատուկ նշվում է աղուտ-ալկալի հողերի մելիորացման մասին, ինչը կարևոր քայլ է չմշակվող հողերը շրջանառության մեջ մտցնելու համար:

6. Հողօգտագործման կարգավորող օրենսդրության բարեփոխումներ

- Ծրագրում ընդգրկված է «չօգտագործվող հողերի դասակարգման և հաշվառման կարգի հաստատման» մեխանիզմ, ինչը թույլ կտա ավելի նպատակային ծրագրեր մշակել դրանց մշակման համար:

Եզրակացություն

Հայեցակարգում առկա են մի շարք դրույթներ, որոնք առնչվում են չօգտագործվող վարելահողերի ներգրավմանը գյուղատնտեսական շրջանառության մեջ: Սակայն, չկա որևէ հատուկ պետական խրախուսման կամ սուբսիդավորման մեխանիզմ, որը կոնկրետ աջակցություն կտրամադրի չօգտագործվող հողերի մշակումը խթանելու համար:

Այս առումով հնարավոր բարելավումների համար կարելի է առաջարկել.

- **Ֆինանսական աջակցություն և խրախուսման մեխանիզմներ`** չօգտագործվող վարելահողերը մշակող ֆերմերների համար:

- **Ջրային ռեսուրսների արդյունավետ կառավարում`** չմշակվող հողերի ոռոգման ապահովման նպատակով:

- **Հողի շուկայի կարգավորման մեխանիզմների պարզեցում`** սեփականատերերին հնարավորություն տալու ավելի դյուրին գործել հողային շուկայում:

Այսպիսով, հայեցակարգը որոշակի հիմքեր է դնում չօգտագործվող վարելահողերի ակտիվացման համար, սակայն գործնականում անհրաժեշտ են լրացուցիչ տնտեսական խթանման գործիքներ` դրանց մշակման արագացման համար:

Այս միջոցառումները հնարավորություն կտան ավելացնելու մշակվող վարելահողերի չափաբաժինը, բարձրացնելու գյուղատնտեսական արտադրողականությունը և ապահովելու Հայաստանի հողային ռեսուրսների առավել արդյունավետ կառավարումը:

Գյուղատնտեսության ոլորտի պետական օժանդակության ծրագրերի վերլուծություն

Հայաստանում գյուղատնտեսության ոլորտում իրականացվող պետական աջակցության ծրագրերը կարևոր նշանակություն ունեն հողերի արդյունավետ օգտագործման և գյուղատնտեսական արտադրության խթանման համար: Տարբեր ծրագրերի շրջանակներում վարկային և փոխհատուցման մեխանիզմների կիրառմամբ պետությունը նպատակ ունի նպաստել ոլորտի զարգացմանը:

Ստորև ներկայացված են մի քանի ծրագրերի արդյունքների տվյալներ, որոնք ուղակիորեն կամ անուղակի միտված են նպաստելու հողերի օգտագործման բարելավմանը և նպաստելու վարելահողերի նպատակային օգտագործմանը:

Ինտենսիվ այգեգործության զարգացման, արդիական տեխնոլոգիաների ներդրման և ոչ ավանդական բարձրարժեք մշակաբույսերի արտադրության խթանման պետական աջակցության ծրագիր

Արդյունքներ և ցուցանիշներ

- 2022 թվականին

Այգեհիմնման պետական ծրագրի շրջանակում հաստատվել է 2450 հա այգիների հիմնում:

Բարձրարժեք մշակաբույսերի մշակության նպատակով հաստատվել է 3,2 հա-ի հայտ:

Նախորդ ինտենսիվ այգեգործության ծրագրի շրջանակում հաստատվել է 197,8 հա-ի այգեհիմնման հայտեր:

- 2023 թվականին

Ինտենսիվ այգեգործության զարգացման ծրագրի շրջանակում վարկային և փոխհատուցման բաղադրիչով հաստատվել է 2363 հա-ի այգեհիմնման հայտեր:

Ընդհանուր առմամբ, 5010.8 հա այգեհիմնման և 3.2 հա բարձրարժեք մշակաբույսերի մշակության հայտեր են հաստատվել:

Համատեքստ և առկա մարտահրավերներ

2023 թ.-ի տվյալներով, պետական աջակցությամբ մշակվել է 5014 հա հող, դարձել է բազմամյա տնկարկ, ինչը կազմում է չմշակվող վարելահողերի (202,800 հա) ընդամենը 2.47%-ը: Այս ցուցանիշը վկայում է այն մասին, որ չմշակվող հողերի վերականգնման և օգտագործման խթանման համար անհրաժեշտ են ավելի ընդգրկուն միջոցառումներ և երկարաժամկետ ծրագրեր:

Տնամերձ հողամասերում այգեհիմնման և ոռոգման արդիական համակարգերի ներդրման փորձնական ծրագրի

Արդյունքներ և ցուցանիշներ

Ծրագրի շրջանակում Բերքաբեր բնակավայրում կնքվել է 45 պայմանագիր՝ 4.504 հա-ի ռոհամար, իսկ Խաշթառակ բնակավայրում՝ 46 պայմանագիր՝ 2.441 հա-ի համար: Ծրագրի կայունության և մոնիթորինգի տվյալները բացակայում են: Սա չի կարող դիտարկվել, որպես ներդրում չմշակվող հողատարածքների օգտագործմանը նպաստող ծրագիր:

Հողային բարեփոխումների փորձնական ծրագիր

Ծրագրի շրջանակում Արմավիրի մարզի Փարաքար համայնքի Բաղրամյան, Նորակերտ և Խոյ համայնքի Հայթաղ բնակավայրերում իրականացվել է վարելահողերի և բազմամյա տնկարկների իրավական խնդիրների ամբողջական գույքագրում, իսկ Արմավիր համայնքի Մայիսյան բնակավայրում իրականացվել են չմշակվող հողերի գույքագրման աշխատանքներ: Հայթաղ բնակավայրում «Գյուղատնտեսական ծառայությունների կենտրոն» ՊՈԱԿ-ի կողմից ձեռք է բերվել 11.4 հա ընդհանուր մակերեսով 39 հողակտոր:

ՀՀ-ում աշնանացան ցորենի արտադրության խթանման պետական աջակցության ծրագիր (2020թ. աշնանացան ցորեն)

Ծրագրի շրջանակում 2761 շահառուի կողմից իրականացվել է 15007 հա աշնանացան ցորենի ցանք:

ՀՀ-ում գարնանացան հացահատիկային, հատիկաընդեղեն և կերային մշակաբույսերի արտադրության խթանման պետական աջակցության ծրագիր (2021թ. գարնանացան):

Ծրագրի շրջանակում 3736 շահառուի կողմից կատարվել է 13299.7 հա գարնանացան գարու, առվույտի և կորնգանի ցանք:

ՀՀ-ում աշնանացան ցորենի արտադրության խթանման պետական աջակցության ծրագիր (2021թ. աշնանացան ցորեն)

Ծրագրի շրջանակում 3922 շահառուի կողմից կատարվել է 12798.63 հա աշնանացան ցորենի ցանք:

ՀՀ-ում աշնանացան ցորենի արտադրության խթանման 2022 թվականի պետական աջակցության ծրագիր

Ծրագրի շրջանակում 2023 թվականին տրամադրվել է շուրջ 4.59 մլրդ ՀՀ դրամ փոխհատուցում: Ծրագրի շրջանակում 22.483 շահառուի կողմից կատարվել է 55.278 հա աշնանացան ցորենի ցանք:

ՀՀ-ում բուսաբուծության պետական աջակցության ծրագիր 2024թ.

Ծրագրի իրականացման արդյունքում ավելացել է գարնանացան մի շարք մշակաբույսերի (հացահատիկային, հատիկաընդեղեն և բազմամյա խոտաբույսեր) ցանքատարածությունները ՀՀ ողջ տարածքում: Ծրագրի շրջանակներում իրականացվել է 19.197 հա գարնանացան:

Բուսաբուծության աջակցության 2025 թվականի ծրագիր

Բուսաբուծության աջակցության ծրագրի նպատակն է հացահատիկային, հատիկաընդեղեն մշակաբույսերի և կերային մշակաբույսերի ցանքատարածությունների ընդլայնման, դրանց մշակության արդյունավետության բարձրացման, համախառն արտադրանքի ավելացման միջոցով բարձրացնել պարենային ապահովվածության մակարդակը, ինչպես նաև բարելավել գյուղատնտեսական նշանակության հողերի որակական հատկանիշները:

Ծրագիրը նախատեսվում է իրականացնել 2025 թվականին և ընդգրկելու է Հայաստանի Հանրապետության ամբողջ տարածքը: Հայաստանի Հանրապետության

համապատասխան մարզի տարածքում խթանվում է աղյուսակում նշված մշակաբույսերի տեսակների մշակությունը:

Արտադրողականության բարձրացման նպատակով նախատեսվում է ցանքերն իրականացնել բացառապես հավաստագրված սերմերով:

Ծրագրով նախատեսվում է 2025 թվականին փոխհատուցել մինչև 100 հա մակերեսով հացահատիկային (աշնանացան և գարնանացան ցորեն, գարնանացան գարի, եգիպտացորեն, վարսակ, հաճար), հատիկաընդեղեն (ոլոռ, լոբի, ոսպ, սիսեռ) և կերային մշակաբույսերի (առվույտ, կորնգան, կերի ճակնդեղ) մշակության մեկ հեկտարի հաշվով կատարվող հիմնական աշխատանքների (վարի, ցանքի, բերքահավաքի) և սերմի արժեքի համար նախատեսված ծախսերի 50 տոկոսը:

Փոխհատուցումը կտրամադրվի հետևյալ սահմանաչափերով`

- աշնանացան ցորենի մշակության յուրաքանչյուր 1 հեկտար մակերեսի հաշվով` 80 000 դրամ,
- գարնանացան հացահատիկային մշակաբույսերի մշակության յուրաքանչյուր 1 հեկտար մակերեսի հաշվով` 70 000 ՀՀ դրամ, իսկ եգիպտացորենի մշակության յուրաքանչյուր 1 հեկտար մակերեսի հաշվով` 85 000 ՀՀ դրամ,
- հատիկաընդեղեն մշակաբույսերի մշակության յուրաքանչյուր 1 հեկտար մակերեսի հաշվով` 100 000 ՀՀ դրամ,
- կերային մշակաբույսերից առվույտի, կորնգանի 1 հեկտար մակերեսի մշակության հաշվով` 110 000 ՀՀ դրամ, իսկ կերի ճակնդեղի համար` 80 000 ՀՀ դրամ:

ՀՀ-ում գյուղատնտեսական նշանակության հողերի միավորման (կոնսոլիդացիայի) աջակցության 2023-2025 թվականների ծրագիր

Ծրագրի շրջանակում կնքվել է 2 պայմանագիր (10-30 հա հողերի միավորում), 3 պայմանագիր (30 – 100 հա հողերի միավորում) և ևս 9 պայմանագիր (5-30 հա հողերի միավորում):

Հայաստանի Հանրապետությունում գյուղատնտեսական նշանակության հողերի միավորման (կոնսոլիդացիայի) աջակցության 2023-2025 թվականների ծրագիրն ուղղված է գյուղատնտեսական հողերի արդյունավետ կառավարման բարելավմանը` խթանելով մասնատված հողերի միավորումը: Այս ծրագրի հիմնական նպատակն է ստեղծել ավելի խոշոր, տնտեսական առումով կայուն հողակտորներ, որոնք կնպաստեն արտադրողականության աճին, գործառնական ծախսերի նվազեցմանը և ներդրումների խթանմանը:

Սակայն ծրագրի շրջանակներում չկան կոնկրետ մեխանիզմներ կամ նշումներ չօգտագործվող վարելահողերի օգտագործման խթանման վերաբերյալ: Չնայած նրան, որ հողերի միավորումը կարող է անուղղակիորեն նպաստել չօգտագործվող հողերի

Նպատակային ներգրավմանը, որևէ հատուկ գործիքակազմ կամ խրախուսման մեխանիզմ չի սահմանվում այս հոդերի մշակումը խթանելու համար:

Միևնույն ժամանակ պարզ չէ այդ միավորված հոդերի հետագա ճակատագիրը, արդյոք դրանք ենթարկվել են մշակման, կամ կա արդյոք պլանավորում: Միևնույն ժամանակ այդքան փոքր թվով պայմանագրերը հավաստում են, որ կոնսոլիդացիայի այս մեխանիզմն արդյունավետ չէ:

Չնայած պետական աջակցության ծրագրերի շրջանակում արձանագրված դրական ցուցանիշներին՝ Հայաստանի գյուղատնտեսության արդյունավետության բարձրացման համար անհրաժեշտ է՝

- ✓ Հոդերի վերականգնման և վերօգտագործման ծրագրերի ընդլայնում
- ✓ Վարկային և սուբսիդավորման քաղաքականության ուժեղացում
- ✓ Տեխնոլոգիական ներդրումների, կայուն և նորարարական գյուղատնտեսական մեթոդների խթանում

Ցավոք, չկա հետևողականություն հաջողված ծրագրերի շարունակականության ապահովման համար: Պետությունը պետք է իրականացնի չօգտագործվող վարելահողերի նպատակային նշանակության վերլուծություն, հողերի որակի քարտեզագրում և նպատակային օգտագործմանը նպաստող գործուղությունների ճանապարհային քարտեզ:

Առաջարկություններ

ՀՀ-ում վարելահողերի չմշակման և ոչ նպատակային օգտագործման դրդապատճառների զգալի մասը պայմանավորված է ոչ միայն տնտեսական գործոններով, այլ նաև հողի որակական վիճակի մասին ոչ ճշգրիտ տեղեկատվությամբ, մելիորացիոն խնդիրներով, ռեսուրսային և տեխնոլոգիական սահմանափակումներով: Հիմք ընդունելով աջակցության ծրագրերի թվային արդյունքները պարզ է դառնում, որ ներկայումս գործող պետական աջակցության ծրագրերի զգալի մասը թիրախային ազդեցություն չեն թողնում չմշակվող վարելահողերի արդյունավետ օգտագործման և նպատակային նշանակության վերականգնման վրա: Մասնավորապես, հողերի կոնսոլիդացիայի ծրագիրը իր առաջարկված մոդելով չի արդարացրել իրեն և կարիք ունի ամբողջական վերանայման: Փոխարենը առաջարկվում է մշակել և ներդնել հետևյալ պետական աջակցության գործիքակազմը:

Պետական աջակցության ծրագրեր՝ չօգտագործվող վարելահողերի օգտագործման խթանման նպատակով

1. Վարելահողերի դասակարգման և մոնիթորինգային նոր թվայնացված համակարգի ստեղծում և ներդրում

- Ներկայումս բազմաթիվ հողակտորներ ունեն վարելահողի գործառնական նշանակություն, մինչդեռ դրանց իրական բնութագրերը և որակական հատկանիշները չեն համապատասխանում հողատեսքի նման դասակարգման: Մասնավորապես խնդիրը վերաբերվում է անջրդի III և IV-րդ կարգի վարելահողերին: Դրանք ոչ միայն պիտանի չեն մշակության համար, այլ ձևավորում են չմշակվող վարելահողերի անփոփոխ մեծ մակերես: Այն դեպքում, երբ այդ հողատեսքերի ճիշտ դասակարգումը կնպաստի դրանց նպատակային օգտագործմանը:
- Պետք է վերանայել վարելահողի սահմանումը և անջրդի IV-րդ կարգի հողերը՝ հանել վարելահողերի կարգավիճակից: Առաջարկվում է վարելահողերի ամենամեծ չօգտագործվող մակերես ունեցող բնակավայրերից մի քանիսում պիլոտային ծրագիր իրականացնել: Դուրս բերել անջրդի III և IV-րդ կարգի վարելահողերը, դրանց դասակարգումը փոխել և հողօգտագործման այլ լուծումներ առաջարկել:
- Առաջարկվում է իրականացնել պետական մասշտաբով հողերի հեռանկարային վերլուծություն: Հողերի դասակարգումը պետք է կատարվի ինտեգրված GIS համակարգով, որը կթարմացվի ըստ սեզոնային արբանյակային դիտարկումների և ագրոտեխնիկական վերլուծությունների:
- Հողի բերրիության քարտեզագրում և քարտի առկայությունը դարձնել պարտադիր:

2. Աղակալված և ալկալի հողերի մելիորացիոն ծրագիր

- Իրականացնել սուբսիդավորման մրցույթային ծրագիր աղակալված հողերի մելիորացիայի ու բարելավման եղանակների փորձարկման և նոր

առաջարկությունների ադապտացման համար: Ծրագրին մասնակացության հնարավորությունն տալ ոչ միայն գիտահետազոտական, ուսումնական կառույցներին, այլև մասնավոր սեկտորին: Պիլոտային ծրագրերը իրականացնել ոչ միայն համայնքային, այլև նաև սեփականաշնորհված աղակալված հողատարածքներում: Ստացված արդյունքների հիման վրա՝

- Մշակել և ներդնել պետական մելորացիոն ծրագիր՝ ուղղված այդ հողերի աղաճեցմանն ու ալկալիության նվազեցմանը՝ բիոռեմիդիացիայի և այլ բնական միջոցներով:
- Օգտագործել բնապահպանական ճշգրիտ մեթոդներ՝ գիպսավորում, գարնանային լվացման համակարգեր, միկրոբիոլոգիական վերականգնում:
- Ներգրավել միջազգային փորձ՝ այդ թվում ՄԱԿ-ի FAO, GEF և այլ համապատասխան կառույցներից՝ տեխնիկական ու ֆինանսական աջակցությամբ:

3. Հացահատիկային մշակաբույսերի խթանման պետական ծրագիր՝ վերանայված պայմաններով

- Առաջարկվում է վերագործարկել ծրագիրը, սակայն տարբերակված չափանիշներով՝
 - Առաջնային սերմնաբուծության խթանում, սուբսիդավորումն անել միայն էլիտա և սուպերէլիտա տեսակի սերմնանյութի ներկրման ու օգտագործման դեպքում (պարտադիր ոռոգվող հողատարածքների դեպքում): Պայման առաջադրելով տնտեսվարողի պարտադիր գրանցումը՝ որպես սերմարտադրող:
 - Սուբսիդավորել միայն էլիտա և սուպերէլիտա սերմնանյութի ներկրումը՝ պարտադիր պահանջելով համապատասխանության հավաստագրերը:
 - Եկրորդային վերարտադրության սուբսիդավորումն (F1) անել միայն տեղական սերմարտադրողից գնում անելու դեպքում՝ խրախուսելու համար տեղական սերմնաբուծությունը՝ ոռոգվող և անջրդի հողատարածքների վրա:
 - Ստեղծել պետական աջակցության ծրագրից օգտվող տնտեսությունների թվայնացված բազա: Հատկապես հաշվառման օբյեկտ դիտարկելով հողակտորը՝ կադաստրային ծածկագրով: Հնարավորությունն տալ նույն հողակտորի համար դիմել 2 տարի ժամկետով, իսկ 3-4-րդ տարին պարտավորել սեփական ներդրմամբ շարունակել մշակությունը: Միայն այս պարագայում հնարավորությունն տալ օգտվել այլ պետական աջակցության ծրագրերից: Սա հնարավորություն կտա շրջանառվող չմշակվող հողերի ճշգրիտ տվյալների շտեմարան ձևավորելուց բացի, այս հողակտորները հանել, դուրս բերել չմշակվող հողերի ցանկից:
 - Սուբսիդավորման ծրագրից օգտվելու համար պարտադիր պահանջ ներառել հողի լաբորատոր փորձաքննության իրականացումը մինչև ցանքը:
 - Տրամադրվող գումարը սահմանել՝ սերմնաբուծական ցանքերի համար՝ 120,000 դրամ/հա, արտադրական ցանքերի համար նվազման սկզբունքով

նույն հողակտորի համար՝ առաջին տարին 100,000 դրամ, երկրորդ տարին՝ 80,000 դրամ:

- Այս ծրագրի շրջանակում անհրաժեշտ է հիմնել կամ արդիականացնել մերձսահմանային սերմերի լաբորատոր փորձաքննության կենտրոն՝ միջազգային չափորոշիչներին համապատասխան:

3. Բազմամյա կերային բակլազգի և հատիկաընդեղեն մշակաբույսերի մշակության խթանման պետական ծրագիր՝ վերանայված պայմաններով

ՇԵՆ ԲՀԿ-ի կողմից իրականացված «Անասնակերի արտադրություն և արոտների բարելավում՝ որպես ՔՈՎԻԴ-19 հետևանքների մեղմման միջոցառում» ծրագրի շրջանակում բարելավվել է 100 հա արոտավայր և մշակվել է 300.4 հա չօգտագործվող վարելահող:

Իսկ «Կերարտադրության ցուցադրական համայնք. բնական կերհանդակների բարելավում և չմշակվող վարելահողերի վերականգնում» ծրագրի շրջանակում իրականացվել են համապարփակ բարելավման միջոցառումներ՝ տարաբնույթ մեթոդաբանությունների կիրառմամբ:

Միջոցառման շրջանակում համայնքում վերականգնվել և/կամ բարելավվել է 123 հա հողատարածք, որոնցից, 20 հա արոտավայրեր, 20 հա խոտհարքներ, 83 հա վարելահողեր:

- Առաջարկվում է պետական սուբսիդավորման ծրագրում ունենալ հատուկ չափորոշիչներ՝ ուղղված բարձրարժեք բակլազգի խոտաբույսերի մշակության խթանմանը:
 - Բազմամյա բակլազգի կերային մշակաբույսերի սերմերի ծլունակությունը պետք է լինի առնվազն 80%:
 - Հատիկաընդեղեն մշակաբույսերի սերմերի ծլունակությունը պետք է լինի առնվազն 95%:
 - Պետք է սերմանյութը ուղեկցվի ՀՀ-ում իրականացված որակի համապատասխանության լաբորատոր փորձաքննության փաստաթղթերով:
 - Պարենի և կերարտադրության ցանքերի համար աջակցությունը սահմանել 100-110,000 ՀՀ դրամ:
 - Տեղական սերմարտադրության ցանքերի համար աջակցությունը սահմանել առնվազն 130,000 ՀՀ դրամ (պարտադիր ոռոգվող հողատարածքների դեպքում):

5. Ագրոանտառաբուծության և օրգանական գյուղատնտեսության խթանում

- Օրգանական գյուղատնտեսության պետական սուբսիդիաների տրամադրում՝ ըստ մշակաբույսերի և գործունեության տեսակի՝

- պտուղների, հատապտուղների և բանջարեղենի, եթերայուղատու և դեղատու մշակաբույսերի, տնկիների դեպքում փոխհատուցումը 1 հեկտարի հաշվով յուրաքանչյուր տարի 300,000 ՀՀ դրամ,
 - հացահատիկի համար՝ 70,000 ՀՀ դրամ,
 - հատիկաընդեղենների համար՝ 120,000 ՀՀ դրամ,
 - կերային մշակաբույսերի համար՝ 100,000 ՀՀ դրամ,
 - օրգանական մեղվաբուծության տնտեսությունների սուբսիդավորում, մասնավորապես՝ 30-50 մեղվափոթակի դեպքում՝ 250, 000 ՀՀ դրամ, 51-100 մեղվափեթակի դեպքում՝ 350, 000 ՀՀ դրամ :
- Օրգանական սերտիֆիկացված տնտեսությունների համար աջակցության փաթեթների ներդրում: Մասնավորապես՝ ոռոգման ջրի 50% սուբսիդավորում, գյուղատնտեսական ապահովագրության սուբսիդավորման տոկոսադրույքի տարբերություն 10%-ի չափով:
- Միկրովարկեր և դրամաշնորհներ՝ օրգանական գյուղատնտեսությամբ զբաղվող ֆերմերների համար:
- Սուբսիդավորման և պետական աջակցության ծրագրերի ներդրում՝ մասնավոր տնտեսավարողների և գյուղատնտեսական միավորների կողմից ագրոանտառների հիմնման համար: Մասնավորապես՝ ջրի խնայողության ու ոռոգման համակարգերի ներդրման և արժեքավոր տնկանյութի ձեռք բերման համար: